



客家語散文 社會組第二名

蛇年講蛇哥（四縣腔）

一般來講旦勢人都係在舊年尾新年頭來論生肖講年房¹。仰恁奇，2013 蛇年行到今十一月十外仔²哩喔³，正想愛來「蛇年講蛇哥」呢？

自十月十六擲出⁴大統混雜油⁵事件到今，就像湖鰱仔搵泥沙樣仔，緊搵緊大條⁶。一項又一項、一間又一間，食用油這兜相關個問題，連峨接棟走走出來，還言得時煞。看到人驚 hab hab 仔⁷，乜正嚇著大家毋知食落肚幾多仔吔？！

莫悵著食品安全，就淨油有問題定定。用「食品安全」做關鍵字，上網 google 一下，阿姆哀～⁸！淨 2013 年就歸大 to' lo' 仔⁹。對五月个「雙鶴」豆油个單氣丙二醇含量超過標準起勢，績等有名个老廠「義美」用過期个黃豆植物性卵白來做細泡芙，跔等又有「毒澱粉事件」，過來米驗出含有殺蟲劑，無就同便宜个進口米擺擺合合¹⁰來賣，還有「胖達人」事件.....，一直到這擺連連拖拖个油品問題這兜，正經看到人目花花，寫乜愛一手來寫，實在還得人畏哪～。

看該兜大頭家，對頭下碼死鴨仔硬嘴辯¹¹，死牯都毋承認、毋肯老實講，到驚腳趕出¹²分人抓著¹³證據，正知今个毋使硬拗吔，乜正知這擺正經拖著屎收馬毋轉¹⁴吔哪。這兜事件，偲看著麼个？簡單講就係人性个「貪」。實在乜恁毋解，《增廣昔時賢文》毋係講：「良田萬頃，日食一升；大廈千間，夜眠八尺」！毋係講人毋好貪心，日仔過得就好！「貪」到恁無 kam` 無 cam¹⁵、恁無天良，實在啗.....敢帶得落窟¹⁶？！

講著「貪」，驚怕毋係這隻時代个人正會恁仔哪！係無，《增廣昔時賢文》仰又會講：「貪他一斗米，失卻(忒)半年糧。」老古言語乜講：「貪多嘍毋綿」、「人心節節高，有酒嫌無糟」¹⁷.....。同「貪」有關，無就勸挽¹⁸人莫貪个往語¹⁹還當多，實在寫毋得幾多。其中有一句「人心不

足蛇吞象」，怕無人毋識聽過。用這句話來解析該兜賺無良心錢个生理人个心，確實無走爭²⁰半息。

講著該長纜纜仔、絮絮掃掃²¹、跣跣糾糾²²緊趕个蛇哥，除忒靠佢來落食个人以外，無論佢大尾細尾，無論識佢也毋識係麼个蛇，也無論佢係惡蛇²³無，怕無幾多儕人毋驚、毋惱佢。借用心理學療癒作用个理論，面對越驚个東西越勢毋好閃開，越勢愛面對个觀念，該打幫恁仔同蛇哥拿來做主題寫，無定著另擺佢就毋會見講著佢就雞嫲皮胖胖²⁴哦。

盤古開天到如今，同蛇哥有關个傳說異多，東、西方國家各有無共樣个傳說。無共樣个民族、無共樣个宗教信仰，對蛇哥也都有無共樣个古好講。西方一等有有名个夏娃，分惡魔蛇哥錫著，毋顧上帝三叮嚀四囑咐走去偷食禁果，乜喊亞當來食，使致到上帝同佢兩儕逐出伊甸園。有人講人類下後所有罪惡个源頭，就係因爭佢兩儕偷食禁果。東方國家講著蛇哥，煉石補天个女媧娘，怕就係源頭哩喔。偲客人个祭天穿、「全國客家日」，論真來講，就會講著女媧娘。這女媧娘，聽講就係人頭那蛇哥身个女神。樣相恁得人驚个東西，仰又會排入十二生肖，自然也有厥傳說故事。

「傳說」、「傳說」，有人傳有人講，久欵古就多，實在講毋得拏。講轉正題，佢毋係愛講別人傳个「古」，佢愛同佢一直記到吾腦屎肚項，同蛇哥有關个經驗記錄下來，看醫得著佢見講著蛇哥就會驚个心理無！

頭擺做細人仔該下，環境污染少，較天然，歇在莊居下²⁵自然當有機會看著蛇哥。熱天去河壩肚項摸螺挖蟹，鏡鮮个河壩水，腳掙掙啊²⁶等一下仔，蜆仔就看現現，看準準拈啊去就有咗，毋多使去挖²⁷到歸巴掌嫲泥漿，裡肚石頭、瓦析仔……麼个拉拉雜雜、mang mang sang sang²⁸个東西都有，正定定仔緊漂水²⁹緊同蜆仔擇出來。天時熱燻燻仔，講著有水好搞，細人仔毋使講乜暢到麼个邊仔，覓著該一下半下仔就起懶筋³⁰搞起啊來。在該屎水³¹屎到佢一身佢一身，一尾蛇哥跣跣糾糾順等塞 bong` bong`仔³²个河壩脣个大棚³³泗一路來，正經尿就會畀嚇出。好得就在水竇肚，反正乜搞到一身溼咗，麼人知得你驚到尿汀汀仔³⁴。手脚溜掠³⁵个人，早就跋起腳落 fang³⁶ lio´，留該無膽个人畀嚇到面 gab 青³⁷伸兩指筭大³⁸，毋係一雙腳 gab gab 顫³⁹，就係在該開聲 nga` 嗽⁴⁰。

在莊下除忒屋下係樵燥米白⁴¹个好額人家，旦勢家庭多多少少都會畜兜仔頭牲，過年過節有好敬神拜喏，乜有好做菜顧飽肚屎，成下仔加減

還有好賣來搵補墊所費。該畜个鴨仔，斯毋係下下就倚恃飼料來摻佢供到大喔。有閒，兄弟姊妹湊等乜就來去釣蛎仔轉來畀食。

去釣蛎仔，行過一條又一條草弄弄仔⁴²个田脣路。怕係佢腳躡草仔絮絮 xiaq xiaq⁴³，嚇著該兜草竇肚个蟲仔蛎仔，乜搵出一陣絮絮掃掃个聲。佢撮下目花⁴⁴還言看真係麼个，佢早就 bid li 瀉⁴⁵毋知瀉到哪去乜。等看真厥魂影，佢个膽強強就會畀嚇爛忒。原來係田脣項、河壩脣、草竇肚盡輒看著个草籐蛇⁴⁶。聽講佢係伯公个褲帶仔，毋好打佢。總講斯愛蛇哥，搭佢麼个蛇，就嚇到人面會走色，心肝嘖嘖滾跳。

頭擺歇單家園屋，牽瓦斯愛比人貴加當多，故所言牽該下愛當多樵杈來用。見土曜日⁴⁷讀書轉來該下晝無就拜日，都愛去山頂搵竹仔、搵撿樵杈轉來團草結⁴⁸正有好燒。山肚項毋使講乜當多蛇哥，青竹絲、燥尾爛⁴⁹、龜殼花這兜一等多。還過，一哪樹林凜凜塞弄弄仔⁵⁰。毋單淨臥起頭那樹樞仔、竹葉、藤仔這兜橫橫挖挖⁵¹，還有跌到歸地泥燥燥酥酥个竹葉，行啊去乜絮絮掃掃。阿姆哀～，下把仔正經搵毋清楚該絮掃聲，係人个腳步聲，也係風吹樹尾聲，還係蛇哥在哪趨啊過个聲？算來係人嚇蛇哥，抑係蛇哥嚇人？總講就係「講著蛇就絮掃聲」⁵²，命就會畀嚇冷⁵³。

有一擺食飽夜趕月光華華，吾姆趕燒趕熱，就愛摻該下晝正該轉來个樵杈團畀好勢。剝啊剝仔～團啊團仔～，竹筴項竟然趨出一尾青竹絲。青竹絲同燥尾爛其實當無共樣，盡大个所爭係，青竹絲，歸尾仔浸青像嫩竹葉个色，毋係毒蛇；燥尾爛，尾截像燥葉樣仔个色，還過兩片側賺有一條白痕，係惡蛇。也就係講，其實毋使恁驚青竹絲。斯講一接眼看啊著，怕旦旦人就先嚇到半條命乜。人講「泥蛇毋咬人，樣相博人惱」，還搭佢惡也毋惡？毒也毋毒？

吾姆講任佢仰仔恁乜恁毋解，這尾青竹絲仰會在竹筴肚項，固得著恁自在著，歸路仔跨佢這兜行乜點零鐘个路轉來屋下，無在半路仔跌下來，嚇著人抑係走忒？也無來傷人？！故所，「佢無來傷佢，佢又哪好去傷佢」。煞煞拿著一枝樹樞仔，定定仔摻佢挖⁵⁴出去大門背⁵⁵，放在田脣項个草竇肚畀走。

毋記得佢讀小學仔幾多年生，曉得搵頭搵尾總怕五、六年級恁大咧。一擺當晝飯碗正放啊下來⁵⁶，吾姆喊佢攞米去下屋阿華伯姆該磨版仔。頭擺人講「下屋」，斯毋係字面項下背該家人恁仔喲。毋單止毋係歇兩隔壁

恁⁵⁷近仔，成時仔還愛行十過零分鐘正到得呢。做細人仔該下吾姆會教，教到恁多姊妹都當乖當聽話，人喊愛做麼个，定著無下二句話。一桶米攞啊著就來去喔。

頭擺毋比得今這下，一哪路開到大嫲條，毋係紅毛泥就麻膠路打到ib亮⁵⁸，猛幾好行。頭擺哪有！旦旦就田脣路細細條仔，有个僅可⁵⁹一儕人行得定定，相閃還愛打側挨身過⁶⁰，還合生草打弄⁶¹。略略仔較無膽个細人仔、細阿妹仔這兜，正經毋多敢行。該係無著鞋行喔，正經行到人腳底撓撓⁶²。

透當晝，田脣路項見毋著半隻魂鳥影，阿華伯姆該也無麼人去磨版仔，毋使守守等等⁶³，兩下半就磨好吔。錢撿好勢，無伴無陣又自家弄弄仔行等轉。行啊行仔，看等行忒一半較加就會到屋吔。仰屎背後⁶⁴有一陣又一陣氣氣呼呼⁶⁵个聲呢？看啊頭前，無人；背後，也見魂影毋著啊！光天白日恁奇得著！跔聲掇轉頭⁶⁶看啊去。吓～！這擺就死無命了～。

左手析背後，該頭那扁扁呼呼滾⁶⁷，頸擲擲探啊探仔，圓身烏him⁶⁸烏him⁶⁸當得人驚个東西，毋就係嘜蛇！頭擺言識見過係言識見過，毋過識聽人講，嘜蛇當毒當惡當得人驚。斯講莫去犯佢，佢也毋會無緣事故⁶⁹來咬人。

佢側側仔看佢一眼心肝想，在屋下係識看過大人摺走入雞埕⁷⁰，無就走入灶下抑係洗身間跑到歸團lon⁷¹仔个臭青嫲⁷²、龜殼花打死。斯講佢單人獨馬一個細妹甥仔⁷³，無畀嚇到開聲噉，抑係同手項攞等个該桶版漿⁷⁴一抨⁷⁵做佢走，就真慶哩喔，還講麼个愛同佢打死。想都無想，頭那一幹，一桶版漿好重仔呢，又拗又擻，遽遽三步併兩步半行半走⁷⁶，搭搭滾⁷⁷轉屋下。這到換佢氣氣呼呼吔哪～。轉到，心肝頭前掌毋得氣順緊啟大氣，還偷偷仔緊看佢有跔等佢來無？竟係毋記得該暗晡睡目有發狂⁷⁸講狂話⁷⁹無。毋過，到今幾下十年吔，該嘜嘜仔个樣相，還清清楚楚記到吾腦屎裡肚就有影。

講蛇哥會跔人轉屋，你信無？！恁仔个例仔怕毋係異多，愛人信驚怕真難！講佢有靈性，人怕就較會接受吔哪。下背再過來講一個佢自家真實經過个例仔。

毋記得佢幾多歲咧，應該斯還言入學，佢同吾老妹正有好日心仔成十點鐘邊仔，跔等吾姆去菜園項。吾姆煞猛改菜地、擻草仔這兜，佢兩姊妹

就還眠床下臭雞腥⁸⁰，知好搞無就肯乖乖奈，毋會 kieuˋ人⁸¹，毋會鬥手 lamˋ搽⁸²就阿彌陀佛⁸³，哪曉得搽做麼个。還記得兩姊妹看等吾姆一鑊頭上一鑊頭下，改出紅 hoˊ紅 hoˊ个蠅公，還有白白肥肥个雞嫲蟲。看佢這兜蠕蠕動、奮奮跳⁸⁴，異生趣。吾姆講做得膠佢這兜拈轉去分雞鴨食，兩隻細手好擲擲仔⁸⁵伸啊出想愛去拈，看佢軟濟搭碓⁸⁶又跣啊入毋多敢拈，正經係又好又畏。結局⁸⁷，細阿妹仔就係細阿妹仔，哪有像細阿哥仔恁好膽⁸⁸！盡尾，一儕一枝竹籊仔⁸⁹挖啊挖仔就適願⁹⁰咧。

兩個細 bud jiauˋ仔⁹¹，頭磬磬仔挖到猛幾暢。壞蹄咧！一尾金黃金黃，手指公恁大尾，毋知麼个蛇，就在佢兩姊妹背囊面頂个吊菜仔葉頂曬日頭。吾姆驚佢傷著佢兩姊妹，遽遽擲著一枝豆 li⁹²，定定仔膠佢挖到田坵肚頂去，再過繼續改菜園。

頭擺，不時就看得著蛇哥，膠該尾蛇哥挖走應當就好咁啊，旨哩！故事還旨得時煞喔。

同論擺⁹³共樣，食飽晝定著愛睡當晝。該當晝食飽收擎咁，子子哀哀橫到大眠床⁹⁴頂準備愛睡目，姊妹仔先撩撩弄弄，正搞啊恬，阿媽哀～眠床脣衫櫥仔面頂，該律圓个目珠猛幾利猛幾金，頭那探啊探仔个，毋就係朝晨看著个該尾蛇哥？！

這下好咁哪，當晝毋使睡了。該尾蛇哥又愛仰結煞呢？吾婆在隔壁間聽著，目睡鬼乜毋知走到那加里羅⁹⁵咁，遽遽過來，還吩咐吾姆講，會來尋人个蛇哥斯毋好膠佢打死喔。兩子家娘一儕一枝棍仔拿等，凳仔墊等企到櫥仔恁高，定定仔尋該尾蛇哥，細心細意膠佢挖下來，帶佢趕出間房、趕出廳下，經過禾埕，經過圖牆⁹⁶出大門，畀落去田坵頂。奇就奇在這。明明就看等佢趕入該生到猛幾標⁹⁷个禾頭下咁，怕就一、兩十分鐘邊仔定定，佢又再過趕入禾埕，跣跣糾糾趕幾遽仔，順等先前趕往出个路線，像人愛再過趕入屋肚、間肚樣仔，還奇哪。這擺吾婆膠佢挖到較遠个田坵頂，正放佢走。透下晝仔，大家注意等佢有再過趕落來無？好得恁仔佢就無再過倒轉來咁。

吾婆吾姆都講，看過恁多蛇哥，就係認毋出這尾係麼个蛇。幾下十年過忒，有恁久仔，屋下人共下坐寮談冇訕打嘴鼓，都還會講起這尾人恁毋解个蛇哥。這擺愛寫這篇文章，又再過同吾姆講起。吾姆無想著佢該央時還恁細，仰到今都還記得這老狗屎！佢問，蛇哥走入屋仰無愛膠佢打死

就好呢？老人家講：恁奇、毋識个蛇哥，該朝晨定定仔同佢逐走，當晝過竟然會尋到屋下來，會知佢係愛來報恩？抑係愛來報冤？敢會同家運有麼个關連？頭擺自家還後生，毋了解這當中有麼个奧秘，乜毋曉去問人。淨知佢無傷恁，恁哪好去傷佢。無論仰仔，這擺个經驗做得講係吾屋下人共同个經驗，到今無人摺佢添放忒。

該日在內溝溪生態展示館看著蛇哥蛻下來个殼，老實講隔等一層玻璃，還係看到人會起雞嫲皮。

蛇哥，人講佢得人驚、邪惡，毋過，就厥經濟價值來講，有人講佢其實係尊貴个。蛇哥蛻殼代表成長，代表新生。這擺食用油品擗出恁大棚个食品安全問題，可能歸下仔愛處理到擎忒⁹⁸，毋係十頭八日恁敲核⁹⁹就理得伸揸¹⁰⁰。換隻正面个角度來看，全民抽 kien' 啊來面對來處理，應當會係一擺新生。

作者註

1. 年房：一年个運勢。
2. 十外仔：十日為「旬」，中旬。
3. 哩喔：合音讀作「lio'」。
4. 擗出：擗，音 biag；爆發出。
5. 混雜油：混充油。
6. 湖鰵仔搵泥沙樣仔，緊搵緊大條：歇後語「湖鰵仔搵泥沙——緊搵緊大條」，猶言「如滾雪球般越滾越大」。
7. 驚 hab hab 仔：惶恐不安。
8. ～：表口語的牽聲。
9. 歸大 to' lo' 仔：一大串。
10. 擺擺合合：音 lo' lo' gab` gab`，意為摻雜、混雜。
11. 死鴨仔硬嘴擗：擗，音 bai'。死鴨子嘴硬。
12. 驚腳趔出：露出馬腳。
13. 抓著：讀作「sa' do`」，抓到。
14. 拙著屎收馬毋轉：「拙著屎」，字面義是抓到大便，此處喻陰溝裡翻船；「收馬毋轉」，意為不可收拾。

¹⁵ 無 kam`無 cam：「kam` cam」，意為章法、準則；「無 kam`無 cam」指毫無章法、準則。

¹⁶ 敢帶得落窟：喻錢財乃身外之物，生命終了，豈能帶進棺材？

¹⁷ 《增廣昔時賢文》說：「山高不算高，人心比天高。白水變酒賣，還嫌豬無糟。」

¹⁸ 勸挽：音 kien van`；勸勉。

¹⁹ 往語：音 gong` ngi`；前人流傳至今，可指點迷津的俗諺語等金玉良言。

²⁰ 走爭：音 zeu` zang`；意為失誤、對不攏、烏龍。

²¹ 絮絮掃掃：音 xi xi so so，義為：1. 擬蛇經過的聲音；2. 擬風吹樹梢的聲音；3. 擬尋找東西，翻動物品的聲音。

²² 跣跣糾糾：音 gio` gio` giu` giu`；意為彎彎曲曲。

²³ 惡蛇：毒蛇。

²⁴ 雞嫫皮胖胖：起雞皮疙瘩。

²⁵ 莊居下：鄉下。

²⁶ 躑躑啊：音 boi` boi` a`；用腳撥一撥。

²⁷ 挖：音 ied`。

²⁸ mang mang sang sang：細碎、雜亂。

²⁹ 漂水：音 peu sui`；在水中以水濾除雜物使清潔。

³⁰ 起懶筋：音 hi` lan`(nan`)gin`；想要偷懶休息。

³¹ 戽水：音 fu sui`；潑水。

³² 塞 bong` bong` 仔：草木茂密、雜草叢生貌。

³³ 大棚：音 tai pen`；土堤、護岸。

³⁴ 尿汀汀仔：音 ngiau din din e`；尿流屁滾，喻驚懼害怕，狼狽不堪貌。

³⁵ 溜掠：音 liu` liag`；靈活、矯健。

³⁶ 落 fang：音 lag fang；逃之夭夭。

³⁷ 面 gab 青：因受驚嚇而臉色慘白。

³⁸ 兩指筭大：兩根手指頭的寬度，形容人受驚嚇後擔驚受怕的面容。「筭」，讀作「bai`」。

³⁹ gab gab 顫：顫，音 zun`，受驚嚇而不停顫抖貌。

⁴⁰ 開聲 nga` 噉：放聲大哭。

- 41 樵燥米白：形容生活優渥安逸。
- 42 草弄弄仔：音 co`nung nung e`；雜草叢生貌。
- 43 絮絮 xiag xiag：擬腳步踏在草叢中的聲響。亦說「xid xid xiag xiag」。
- 44 撮下目花：音 cod`ha mug`fa`；一下恍神、一不留神。
- 45 bid li 瀉：擬逃跑動作迅速貌。
- 46 草筊蛇：音 co`bai`sa`；草花蛇。
- 47 土曜日：禮拜六。
- 48 團草結：撿拾回來的參差柴薪，將之剁短綁成一束一束以利入灶燃燒。
- 49 燥尾爛：音 zau`mi`lad`；赤尾青竹絲，有毒。
- 50 樹林凜凜塞弄弄仔：「樹林凜凜」讀作「su na`lim`lim`」，樹木枝繁葉茂狀；「塞弄弄仔」：草木密密叢叢貌。
- 51 橫橫挖挖：音 vang`vang`vag`vag`；橫七豎八。
- 52 講著蛇就絮掃聲：喻杯弓蛇影、捕風捉影。
- 53 命就會畀嚇冷：被嚇得半死，此處形容被蛇嚇到。
- 54 挖：音 vag`。
- 55 大門背：大門外。
- 56 當晝飯碗正放啊下來：意為剛吃完午餐。
- 57 恁：音 an。
- 58 ib 亮：平整（滑）光亮。
- 59 僅可：音 giun`ko`；只能。
- 60 挨身過：擦身而過。
- 61 生草打弄：雜草叢生。
- 62 腳底撓撓：「撓撓」讀作「neu`neu`」，搔癢的感覺。腳底撓撓，除了被搔癢時會有此感覺之外，因受到驚嚇，心生恐懼之感，也會有此反應。
- 63 守守等等：長久等候。
- 64 屎背後：音 sii boi heu`；背後。
- 65 氣氣呼呼：音 hi hi fu fu；氣喘吁吁貌。
- 66 撇轉頭：音 ngau zon`teu`；轉頭。

- 67 呼呼滾：讀作「fu fu gun`」，擬呼吸急促聲。
- 68 烏 him` 烏 him`：形容黑色。
- 69 無緣事故：無緣無故。
- 70 雞埗：音 gie` ji；雞舍。
- 71 歸團 lon` 仔：纏、縮成一堆或一團貌，如毛線或蛇等。
- 72 臭青嫲：音 cu qiang ma`；臭青母。
- 73 細妹甥仔：女生。於己用於自謙；於人則屬嘲謔、譏諷時用之，敬稱時不用。
- 74 板漿：音 ban` jiong`；米浸泡變軟後，磨出的液狀物稱之。
- 75 抨：音 biang`。
- 76 半行半走：連走帶跑。
- 77 搭搭滾：擬走路發出的聲響。
- 78 發狂：音 bod` kong`；作惡夢。
- 79 講狂話：作惡夢時發出夢囈。
- 80 眠床下臭雞腥：床鋪下還有雞的腥臊味。隱喻還是小孩，尚未長大、還不懂事。
- 81 kieu` 人：哭鬧吵人，通常用於小孩。
- 82 鬥手 lam` 摻：湊熱鬧想要幫忙，卻是越幫越忙。
- 83 阿彌陀佛：音 o` ni` to` fud；阿彌陀佛。採集鄉間老者的口音，是為記。
- 84 奮奮跳：音 bin` bin` tiau`；因掙扎而不斷扭動、彈跳。
- 85 好擲擲仔：音 hau jied jied e`；興致勃勃、興致高昂貌。
- 86 軟 ji` 搭碓：音 ngion` ji` dab` doi；軟趴趴地。一般收詞寫作「軟柔搭碓：讀作「ngion` qi` dab` doi」。但采集到家鄉八十幾歲老者的口語音是為「ngion` ji` dab` doi」，為保留家鄉口音，特此為記。
- 87 結局：終究。
- 88 恁好膽：有膽識、膽子大。
- 89 竹箨仔：竹片。「箨」，讀作「bai`」。
- 90 適願：音 did` ngien；滿足願望、過癮之意。
- 91 細 bud jiau` 仔：稱小孩。
- 92 豆 li：讓豆苗攀附生長的竹子。

- 93 論擺：音 nun bai`；往常。
- 94 大眠床：通鋪。
- 95 加里羅：音 ga' li' lo`；遙遠、不知名之處。
- 96 圍牆：音 tu` xiong`；圍牆。
- 97 標：音 beu'；作物生長茁旺貌。
- 98 攀亼：音 qiu' qib；完整、完善。
- 99 敲核：音 lud` fud；簡單、輕易；。
- 100 伸揸：音 cun' ca'；平整、平順。「理得伸揸」，意即可以處理妥當、擺平。

作者感言



陳美蓉 客家電視臺語言管理師

自細在客家莊過日仔，到今腦屎肚還添放毋忒个東西，用客話同佢寫出來，日仔，無論頭擺也係眼時就有咗蹤影。

得獎係鼓勵、係滋養，承蒙評審先生个牽成，恁仔細。